

PRATHAMAS SARGAH
ARAN LAN WEWIDANGAN DESA

Pawos 1

- (1) Desa Pakraman puniki mawasta Desa Pakraman Ubung.
- (2) Krama Desa Pakraman Ubung kasanggra antuk Krama Banjar maka panyiwu Pura Khayangan Tiga luwire :
 - ha. Krama Banjar Sedana Mertha.
 - na. Krama Banjar Tengah
 - ca. Krama Banjar Sari.
 - ra. Krama Banjar Batur.
 - ka. Krama Banjar Mertagangga.

Pawos 2

- (1) Pinaka wates wawengkon Desa Pakraman Ubung inggih punika :
 - ha. Sisi Kaler : Desa Pakraman Pohgading.
 - na. Sisi Kangin : Tukad Badung.
 - ca. Sisi Kelod : Desa Pakraman Denpasar.
 - ra. Sisi Kauh : Tukad Mati.
- (2) Manut Trilingganing Desa, kakuwub wawidangannyane kaepah dados tatiga.
 - ha. Utama Mandala makadi tegak Khayangan Tiga.
 - na. Madya mandala makadi papupulan karang paumahan, telajakan desa, rurung, margi lan tukad.
 - ca. Nista Mandala mekadi setran Desa.
- (3) Pinaka wates palemahan Desa/Banjar patut:

- ha. Kamanggehang antuk Paruman Desa/Banjar.
- na. Wenang gentos manut kawentenan Desa/Banjar.
- ca. Manut pararem Banjar dados kaepah antuk arahan.

Pawos 3

- (1) Banjar Pakraman wenang ngaryanin Awig-Awig maka pamikukuh lan sepat siku-siku Krama Banjar.
- (2) Awig-awig Banjar, miwah sakaluwiring sekeha tan wenang lempas ring awig-awig Desa miwah pararem Desa Pakraman Ubung, saha kalingga tanganin antuk Bendesa.

DWITYAS SARGAH

PATITIS LAN PAMIKUKUH

Pawos 4

Desa Pakraman Ubung ngamanggehang pamikukuh :

- ha. Pancasila.
- na. Negara Kesatuan Republik Indonesia (NKRI)
- ca. Undang-Undang Dasar 1945, pamekasnyane pasal 18.
- ra. Bhineka Tunggal Ika.
- ka. Tri Hita Karana manut Tatwa, Susila, lan Upakara Agama Hindu.
- da. Pasuaran Sang mawang Rat nganinin indik Desa Pakraman.

Pawos 5

Luwir Petitis Desa Pakraman Ubung :

- ha. Mikukuhin miwah ngarajegang sesana-sesana sane manut linging Sang Hyang Agama.
- na. Nginggilang Tata Susila Prawerti Agama.

- ca. Ngarajegang kasukertan Desa, saha pawongannya sekala wiadin niskala.
- ra. Ngamecikang miwah ngupekaren sakeluwiring daging Desa Pakraman.

TRITIYAS SARGAH
SUKERTA TATA PAKRAMAN

Palet 1

Indik Krama

Pawos 6

1. Krama, ring Desa Pakraman Ubung kabinayang inggih punika:

Ha. Krama Desa, Inggih Punika kulawarga sane maagama Hindu, sane magenah ring wewengkon Desa Pakraman ubung, utawi ring genah siosan, sane `mipil/kasurat pinaka krama ring Desa Pakraman Ubung lan nyungsung Kahyangan Desa.

Na. Krama Tamiu, inggih punika kulawarga sane maagama Hindu, sane magenah ring wewengkon Desa Pakraman Ubung, sane nenten mipil utawi kasurat pinaka krama ring Desa Pakraman Ubung, sakewanten mipil ring desa sewosan.

Ca. Tamiu, inggih punika kulawarga sane nenten maagama Hindu, magenah ring wewengkon Desa Pakraman ubung.

Pawos 7

Krama Desa/Banjar kapalih dados tatiga inggih punika :

- (1) Krama sane sampun jenek mawiwaha.
- (2) Krama Balu.
- (3) Krama ngelintik.

Pawos 8

Sehanan krama Desa/Banjar keni ayahan sane kapalih dados 3 inggih punika :

- (1) Ayah jangkep saking krama/kulawarga sane sampun tur jenek mawiwaha.
- (2) Ayah balu saking krama balu (lanang/istri).
- (3) Ayah balu ngelintik, utawi daha teruna.

Pawos 9

Tategenan krama Desa/Banjar sekadi ring sor puniki:

- (1) Krama sane jenek mawiwaha keni ayahan/pepeson mamungkul.
- (2) Krama balu keni ayahan/pepeson aparo.
- (3) Krama ngelintik luput saking keni ayahan/pepeson (sakalilan ipun).

Pawos 10

Ngawit dados krama Desa/Banjar wenten kalih luire :

ha. Ngawiwit saking jumenek mapumahan wiadin ngarereh pangupa jiwa sajeroning palemahan Desa Pakraman tur sampun tedun mabanjar Pakraman, saha kaetang antuk soang - soang Banjar.

na. Malarapan antuk pawiwahan preti sentana manut aksara (ha) ring ajeng sasampune kacihnayang antuk pawidi widanan tur kacihnayang antuk ilikita pastika saking sang mawang rat (Akte Perkawinan).

Pawos 11

Swadarmaning krama Desa, krama tamiu lan tamiu:

- (1) Swadarmaning Krama Desa/Banjar
 - ha. Tinut saturut ring sadaging awig-awig, pasuaran pararem desa.
 - na. Ngutsahayang mangda Desane mresidayang ngungsi petitis sekadi pawos 5 (lima) ring ajeng.
- (2) Swadarmaning Krama Tamiu lan Tamiu:
 - ha. Tinut seturut ring tetiwak Desane ngupadi sukerta sekala.
 - na. Tan wenten tungkas ring sepemargin Kertin Desane.

Pawos 12

Petiyas utawi olih-olihan Krama Desa :

- ha. Polih pasayuban prajuru, ngamanggehang luwir petitis tur kabawosin saha katiwakin pamutus sahanan wicaran nyane.
- na. Nyarengin paruman Desa/Banjar saha wenang mastikayang pamutus.
- ca. Kengin makadi ring sor :
 1. Mapuwangkid, ngaluputan ayah-ayahan Desa/Banjar, sasampune wenten pasadok sapariindikan nyane ring i prajuru.

2. Ngamademang ayah-ayahan, papeson riantukan sampun wenten nyalediyinin muah lintang yusa wiadin pinunas ngaraga sangkaning sungkan-sungkanan manut pangunadikan prajuru.
3. Ngetut ayah-ayahan papeson, antuk harta brana wenang anut laksana, sajawaning kalebubaangan utawi kacuntakan.

Pawos 13

- (1) Sang wusan makrama Desa/Banjar sangkaning magingisir genah ke Dura Desa, patut nunas panugrahan lan ilikita pastika saking i prajuru.
- (2) Sang sane wusan makrama Desa/Banjar tan polih pah-pahan sangkaning padruwen Desa/Banjar.
- (3) Prade riwekas mawali ngaranjing makrama Desa, yan sangkaning rahayu kadadosang, saha upakara sanistane cane lan pejati, sakewanten nenten malih naur batu-batu.

Palet 2

Indik Prajuru Lan Panglingsir Desa

Pawos 14

- (1) Desa Pakraman Ubung kaenter antuk Bendesa.
- (2) Banjar Pakraman kaenter antuk Kelihan Banjar.
- (3) Bendesa lan sahanan Kelihan Banjar patut:
ha. Mawiwit saking krama desa, tur tan ceda angga lan cedang budi , mayusa nenten langkung 65 warsa.
na. Uning ring catur dresta pakraman ring Ubung.

- ca. Bendesa, petajuh, panyarikan, patengen lan pangliman kaadegang malarapan antuk pangarsan krama Desa Pakraman Ubung, nyabran 5 (limang) warsa nemonin Ngembak Geni Tahun Caka, saha maduluran Dewa Saksi.
- ra. Kelihan Banjar Pakraman kaadegang manut awig-awig Banjar soang-soang.

Pawos 15

Tata caraning ngadegang prajuru :

- ha. Bendesa, Petajuh, Panyarikan, Patengen, pangliman, kawastanin Prajuru Desa Pakraman, sane kaadegang saking para duta Banjar soang-soang, saha akwehnyane manut dudonan.
- na. Duta banjar ring ajeng mangda kasudi antuk krama banjar.
- ca. Prajuru Desa Pakraman inucap pawos 15 (ha) ring ajeng, kasudi olih Kerta Desa, para Kelihan lan Kerta Banjar, sawewidangan Desa Pakraman Ubung, saha Kerta Desa sinanggeh prawartaka.
- ra. Saking soang-soang Banjar kawenangan kaanggehang prajuru sanistane adiri, tan kengin ngadegang krama sane kantun dados Kelihan ring banjar pakraman.
- ka. Krama sane kasudi dados prajuru, kamanggehang madeg risampun kararemin.

Pawos 16

- (1) Bendesa Pakraman Ubung kasanggra antuk :

- ha. Petajuh, utawi pangliman pinaka wakil nyane sane ngawidangin Parhyangan, Pawongan lan Palemahan;
 - na. Panyarikan pinaka juru surat;
 - ca. Patengen pinaka pangemong padruwen Desa;
 - ra. Kasinoman pinaka juru arah;
 - ka. Kelihan Banjar Pakraman.
- (2) Wawilangan panyangran nyane manut dudonan.
- (3) Sajeroning ngenterang sukerta niskala Bendesa Pakraman mingsinggihang pemangku Khayangan Desa, saha pamargine manut sakadi daging pararem, sane sampun kasurat ring Tata-titi Upacara-Upakara sawewengkon Desa Pakraman Ubung.
- (4) Prajuru ngadegang panglingsir sinanggeh Kerta Desa antuk tata cara saha wawenang:
- ha. Sane mawiwit saking prajuru lepas, sang wikan ring adat lan agama, adiri sinanggeh panua kasarengin panyarikan pinaka juru surat;
 - na. Kerta Desa puniki katah nyane siya (9) diri, sane kaadegang olih Prajuru Desa manut pawos 16 (4), tur kasumanggemang antuk Krama Desa;
 - ca. Kerta Desa ring ajeng (na) mawiwit saking:
 - a. Banjar Sedana Merta kalih diri
 - b. Banjar Tengah kalih diri
 - c. Banjar Sari kalih diri
 - d. Banjar Batur adiri
 - e. Banjar Mertagangga adiri
 - f. Adiri kasudi antuk Jero Bendesa

- ra. Kerta Desa puniki kaanggehang sajeroning limang warsa, tur dados kasudi malih.
- da. Munguwing kawenangan Kerta Desa inggih punika :
1. Nyarengin Prajuru Desa pacang matetimbang indik punapi luwire pidabdab ring Desa Pakraman.
 2. Nureksain wiadin nyelehin napi luwire sane sampun dados rencana/ keputusan,
 3. Kabuatang utawi nenten, wenang Kerta Desa ngicen tatimbang ring prajuru Desa.
 4. Nibakang pamatut risajeroning wicara ring Desa Pakraman, pinaka babanding saking Bendesa.
- (5) Mangda sutrepti pamargin Tri Hita Karana ring desa pakraman, prajuru wenang ngadegang Pecalang, sane akwehnyane manut dudonan.

Pawos 17

Swadarmaning Prajuru Desa/Banjar luire :

- ha. Ngenterang pamargin sadaging awig-awig, pasuara miwah pararem-pararem Desa.
- na. Nuntun tur ngenterang Krama Desa ngupadi anut ring petitis.
- ca. Nuntun saha nyaksinin tata cara muah sangaskaraning kauripan mabuat sane ngilitang sulur pakulawargan.
- ra. Maka Duta Desa, matemuang bawos ring sapa sira ugi.
- ka. Mawosin kalih niwakang pamutus marep ring wicara warga Desane.

da. Prade wenten prajuru aswadarma utawi nilar sasana, keni pamidanda nikel ring kaiwangan l-krama, muah kengin kawusang manut pararem.

Pawos 18

Petias utawi olih-olihan Prajuru Desa/Banjar :

ha. Luput rarempon lan ayahan ring Desa Pakraman, miwah ring Banjar Pakraman.
na. Olih-olihan siosan manut pararem.

Pawos 19

Prajuru/Panglingsir Desa kagentosin riantukan :

ha. Lina.
na. Pinunas ngaraga riantukan sungkan lan sakeluwire.
ca. Kanorayang antuk krama desane, menawi ngawetuang biuta.
ra. Risampun panamaya, wit saking kaadegang manut pawos 14 (3). ca. ring ajeng.
ka. Ngentosin prajuru, mangda sajeroning parareman tur kaingkupin antuk Krama Desa Pakraman, saha kakaryanin upakara pejati.

Palet 3

Indik Paruman

Pawos 20

Paruman ring Desa Pakraman Ubung wenten petang soroh :

- ha. Paruman Desa kawentenang nyabran ngawarsa, nemonin Ngembak Geni utawi padgata kala manut wiguna, kamiletin antuk krama Desa Pakraman Ubung.
- na. Paruman Prajuru, kawentenang sanistannyane nyabran 6 (enem) sasih apisan, kamiletin antuk sahananing Prajuru Desa, Kelihan Banjar miwah pemangku, manut dudonan utawi padgata kala manut wiguna.
- ca. Paruman Banjar, manut parareman Banjar soang-soang.
- ra. Paruman Sekeha-sekeha, manut parareman sekeha-sekeha.

Pawos 21

- (1) Sajeroning paruman/sangkep, madudonan kadi ring sor :
 - ha. Prasida kamargiang sasampune ke rawuhin lintang ring aparo.
 - na. Sane patut ngamiletin malarapan antuk suaran kulkul saha mabusana adat, tur nenten wenang makta gegawan sakeluwire.
 - ca. Patut nganutin genah saha mecane.
- (2) Sajeroning ngamiletin paruman, mangda mabawos sane becik.
- (3) Pangawit paruman, kamargiang nyacak wilangan para pamilet sane ngarauhin, miwah salantur nyane.
- (4) Tan maren kamanggala ngarcana ring Ida Begawan Panyarikan, maka serana widi widana cane.
- (5) Pikenoh utawi pamutus, kautsahayang malarapan antuk paingkupan (gilik seguluk), prade tan sida, suara sane makehan, sinanggeh pamutus.

Pawos 22

- (1) Sajeroning paruman Desa/Banjar Pakraman, Bendesa/Kelihan patut nyobyahang sapemargin ngenterang Desa/Banjar, pamekas nganinin indik, sakeluwiring :
 - ha. Munjuk lungsuring pakraman, minakadi ayah-ayahan, sulur arta brana, druwen Desa/Banjar, miwah sane siosan.
 - na. Pidabdab Prajuru nganinin usaha desane kapungkur.
 - ca. Sahanan wicara saha pamutus nyane lan sepanunggal nyane.
- (2) Sahanan kasiarang ring ajeng, katitenin, saha katiwakin pamutus antuk paruman Desa/Banjar Pakraman.
- (3) Pamutus paruman Desa/Banjar Pakraman sinanggeh pararem maka pamitegep, pelaksananing awig-awig puniki.

Pawos 23

- (1) Paruman Prajuru patut:
 - ha. Kawentenang sanistane nganem sasih apisan, bilih-bilih padgata kala, manut wigunan nyane.
 - na. Kasarengin antuk sahanan Prajuru Desa/Banjar Pakraman, miwah pemangku manut dudonan.
 - ca. Katuntun antuk Bendesa/Kelihan Banjar Pakraman.
- (2) Paruman Prajuru ngarencanayang, tata upaya ngalaksanayang usaha miwah pangerencana sakeluwire.
- (3) Pamutus sahanan rancangan bilih-bilih rencana sane niwakin tategenan ring ikrama tan patut kalaksanayang saderenge kapikukuhin antuk paruman Desa/Banjar Pakraman, manut dudonan.

- (4) Pamutus Paruman Prajuru sane mawiwit saking Sang Mawang Rat sinanggeh pasuara Desa Pakraman Ubung.

Pawos 24

- (1) Paruman sekaa- sekaa kawentenang sanistane, nganem sasih utawi padgata kala manut wigunannyane soang-soang.
- (2) Nyabran / nangken paruman patut atur supeksa riin ring prajuru Desa utawi Banjar Pakraman prasida tan lempas ring petitis pawos 5 ring ajeng.

Palet 4

Indik Kulkul

Pawos 25

- (1) Kulkul Desa Pakraman Ubung, kapalih dados tatiga inggih punika :

ha. Kulkul Desa.

na. Kulkul Banjar, wenten kakalih luire, kulkul Ageng miwah kulkul Alit.

ca. Kulkul Sekaa – sekaa.

- (2) Kulkul masuara nganutin Tri Bratha Sandhi; Dharma, Sima lan Laksana pasuka-dukaan Desa utawi Banjar Pakraman Ubung.

ha. Dharma; Kulkul masuara nganutin upacara Agama.

na. Sima; kulkul masuara nganutin adat istiadat (dresta) sane kamanggehang.

ca. Laksana; kulkul masuara nganutin sawatek pakaryan sane kalaksanayang antuk Desa/Banjar Pakraman Ubung.

(3) Mungging tabuh tatepakan kulkul sekadi ring ajeng wantah masiosan manut tatujonnyane luire:

ha. Prade wenten pakaryan Desa, kulkul desa pakraman katepak masuara sada banban kalih paletan.

na. Prade wenten pakaryan Banjar Pakraman, kulkul Banjar Pakraman alitan katepak masuara sada banban kalih paletan.

ca. Prade wenten anak lina kulkul Banjar sane Ageng katepak masuara banban kalih paletan, saha kulkul katepak ritatkala matektekan, nyiramang layon lan mamargi kasetra.

ra. Prade wenten umah puun utawi kapengawan kulkul katepak tigang paletan, sane apaletan tigang kalentungan.

ka. Prade wenten jadma ngamuk kulkul katepak bulus mawaneng kirang langkung amenit dados apaletan.

da. Prade wenten jadma kamalingan kulkul katepak limang paletan. Sane apaletan tigang kalentungan.

(4) Suaran kulkul inucap ring ajeng, kawastanin Panca Maha Suara Manggala Dhara, teges nyane:

ha. Panca ngaran lalima.

na. Maha ngaran Ageng/Agung.

ca. Suara ngaran ringan (wirama).

ra. Manggala ngaran pamucuk

ka. Dhara ngaran kagambel (kakukuhin).

(5) Gagawan krama sane nedunin nganutin pasuaran kulkul.

- (6) Kulkul inucap tan wenang katepak, yan tan sangkaning pituduh prajuru, sajawaning wenten cihna kapanca baya.
- (7) Sang nepak kulkul patut suma-kuta (pratiyaksa riin) minakadi nyulurin pamargine ritatkala wenten kapanca bayan.
- (8) Prade wenten nepak kulkul manut tengeran kapanca bayan, mawastu ngamedalang krama, kasujatinyane tan wenten panca bhaya punika, wenang sang nepak kadanda antuk cane masasantun satak seket jinah bolong, saha sasantunnyaane kapidaro kalih; satus selae katur ring Desa Pakraman Ubung, miwah satus selae ngaranjing padruwen Banjar ring genah kulkul katepak.

Indik Padruwen Desa

Pawos 26

Padruwen-padruwen ring Desa Pakraman Ubung :

- (1) Khayangan Desa luire ;
 - ha. Pura Desa, Pura Puseh, Pura Dalem, Prajapati, Pura Melanting, Pura Kali Pangi lan sakaluwiring busanannyane miwah piranti-piranti minakadi :
 1. Palinggih ring marga tiga/pempatan agung magenah ring wawidangan Banjar Pakraman Sedana Mertha.
 2. Palinggih tetamanan Khayangan Tiga Desa Pakraman Ubung.
 3. Balai Agung/Balai panjang miwah Balai kulkul.

na. Pura Dalem wenten kalih palebahan inggih punika :

1. Pura Dalem Penataran lan Prajapati Kelod magenah ring wawengkon Banjar Sedana Mertha Desa Pakraman Ubung.
 2. Pura Dalem Alas Harum lan Prajapati Kaler magenah ring wawengkon Banjar Batur Desa Pakraman Ubung.
- (2) Tanah Tegalan sane wenten ring Jalan Pidada VII, melinggah 800 M2, lan tanah tegalan sane wenten ring Gang Angsoka (genah TK. Widyasanthi II), malinggah 950 M2.
- (3) Setra, sane palebahan nyane kapinaro dados tiga.
- ha. Setra rare genah mendem wong rare sadereng meketus .
- na. Setra gede genah mendem wong ngawit sampun meketus ngantos wong tua, tur soang-soang karempun antuk Banjar manut dresta.
- Ca. Setra genah makinsan
- (4) Lelanguan, makadi tetangguran lan ilen-ilen luire :
- ha. Kulkul Desa ring jaba Balai Agung
- na, Tetangguran marupa angklung.
- (5) Nyasa lan sasanti.
- ha. Nyasa : Dulang/sesenden, madaging canang rebong, masesari jinah andel-andel saha dupa, saha ongkara sajeroning candi maundag tiga.
- na. Karana Hita Werdisha, (malarapan pakilitan/ubung, ngupadi sukerta sekala niskala.
- (6) Lembaga Perkreditan Desa (LPD).
- (7) Pasar Adat Desa Pakraman Ubung.
- (8) Yayasan Pendidikan TK. Widyashanti II

Pawos 27

Kawigunan tanah palaba Pura inucap ring ajeng :

- ha. Sampun manggeh tegak Khayangan Desa, Setra lan paumahan.
- na. Pamuponnyane kaanggen prabia piodalan saha anggen ngamecikang wawangunan ring Khayangan Desa.
- ca. Padruwen ring Desa tan dados kaadol, katukarin utawi kasandang, sajawaning sampun polih kararemin antuk krama Desa utawi kawigunannyane manut patitis. pawos 5 ring ajeng.

Pawos 28

Olih-Olihan Desa Pakraman luire :

- ha. Olih-olihan saking palaba pura.
- na. Olih-olihan saking usaha Desa Pakraman.
- ca. Urunan krama Desa Pakraman.
- ra. Paican saking Guru Wisesa.
- ka. Dana punia tiosan sane patut.

Pawos 29

- (1) Nyabran paruman Desa, Prajuru patut nyobiyahang pariindikan munjuk lungsuring druwe ring krama Desa antuk ilikita pastika.
- (2) Sakaluwiring padruwen Desa patut kailikitayang,

Palet 6

Sukerta Pamitegep

Kaping 1

Karang lan Tegal

Pawos 30

- (1) Krama sane ngamong tanah palaba pura miwah karang lan tegal, patut ngawatesin karang inucap antuk pagehan wiadin tembok, pinih ajeng sane marep kamargine mangde katon asri.
- (2) Watese sisi kaler miwah kangin patut kakaryanin antuk sang madru we karang, inggih punika mawasta gagaleng kaluan.
- (3) Peradene karasayang pageh inucap ngalikadin, yaning pada arsa pakadinnyane kengin watese ngangen pinget kemanten.

Pawos 31

- (1) Tanah Tegalan patut magaleng kateben, pitegesnyane watese sisi kulon miwah kidul patut kakaryanin antuk sang madruwe tegal.
- (2) Wates inucap kengin antuk pagehan wiadin precihna pal (KPT) pinaka wates tanah.
- (3) Makarya wates wiadin tembok, mangda kajantenin antuk pangadinnyane.

Pawos 32

- (1) Sinalih tunggil krama Desa lan Banjar tan kalugra :
ha. Ngalalah karang, tanah palaba pura, margi, lan Tegal.
na Ngalalah tanah tegak khayangan, setra lan sapanunggalnyane

- ca. Ngembahin toya wit wawalungan, pasiraman, miwah kakus, toyan pawaregan kapekarangan krama-krama panyandirig utawi kamargine.
- ra. Ngentungang wangken wawalungan, mis/luhu katukade utawi kapekarangan krama siosan.
- (2) Prade wenten mamurug kecape ring ajeng, keni pamidanda :
- ha. Patut ngawaliang sane kalalah miwah kadanda manut parareman.
- na. Sajaba kadanda makadi angka (2) huruf ha, maweweh panyangaskara tanah Khayangan sane kalalah.
- ca. Manut angka (1) huruf ca ring ajeng patut kautsahayang pamargin toyane punika.
- ra. Patut nanem wangke miwah mis/luhu inucap manut genah.

Kaping 2

Papayonan

Pawos 33

- (1) Ngawit nanem papayonan patut adepa agung (2,5 meter) ngajeroang saking wates.
- (2) Tan kalugra wit taru;
- ha. Mentik sajeroning wates.
- na. Ngalintangin wates, bilih-bilih mawastu mayanin kapisaga.
- (3) Prade wenten manut angka (2) ha ring ajeng, sang kajrihin kengin matur upeksa ring prajuru, tur prajuru mituduhin sang nruwenang wit mangda ngarebah taru inucap, yaning sampun jantos ping tiga nyadokin ring prajuru, taler durung karebah, kengin sang nyaduang ngarebah taru inucap tur

pinaro tiga; asiki katur ring prajuru, miwah sane kakalih kabagi antuk sang madruwe wates.

- (4) Prade wenten sinanggeh mayanin, sang kajrihin patut matur upeksa ring prajuru tur sasampune kaparitas mituduhin sang nruwenang wit, mangda munggul utawi sanistane nyepat gantungin.
- (5) Sane keni pamidanda panyangaskara saha prabia manut parareman sane karubuhin:
 - ha. Sang nruwenang wit sinanggeh mayanin, prade pungkut ngarubuhin wawangunan pangadinnyane.
 - na. Sang notor, munggul utawi ngarebah taru, prade pungkut Ngarubuhin wawangunan jatma siosan.
 - ca. Panyangaskara inucap sanistane prayascita jangkep tur ngamecikang sane karusak.
- (5) Yaning wenten papayonan rebah tan pajanten, sang sane madrebe papayonan punika tan dados kakeniang prabia karusakan, tur papayonan punika dados kaambil antuk sang keni baya.

Kaping 3

Wawangunan

Pawos 34

- (1) Wawangunan patut:
 - ha. Ngangge asta bumi gagulak asta kosala kosali, sanistanyane manut ring petitis niskala.
 - na. Tan dados nyayubin kapisaga.

- (2) Prade wenten mamurug kecape ring ajeng (1) na, risampun kasadokang ring prajuru patut keni pamidanda manut pararem.
- (3) Prade wawangunan ring telengin wates, patut ngawentenang paigum ring pangadinnyane, tur masadok ring prajuru Desa/Banjar Prade mamurug, riwekas yaning kawera antuk pangadinnyane wenang wawangunan inucap kagubar, saha tan polih prabia kapocolan, wawangunan inucap sanistane patut kakaryanin abangan.

Kaping 4

Wawalungan

Pawos 35

- (1) Sahananing warga Desa/Banjar Pakraman sane mamiara sakaluring wawalungan, patut sayaga nitenin (negul/ngelogorin) saha ngutsahayang mangda wawalungannyane nenten ngarusak karang utawi paabianan krama siosan, bilih-bilih ngaranjing/ngaletihin khayangan/pariyangan.
- (2) Krama sane jenek ring wewidangan Desa Pakraman Ubung sane mamiara sahanan wawalungan patut bacin wawalungannyane nenten ngamedalang ambu kaon sane mikobetin krama sewosan. yaning sang madruwe wawalungan inucap mamurug kecape ring ajeng, prajuru patut ngelanturang majeng sang rumawos.
- (3) Prade wenten sakadi ring ajeng, patut kapalungguhang ring sane madruwe wawalungane.

- (4) Yaning wenten ping kalih malungguhang tur kasadok ring prajuru mangda katiwakin pamidanda sekadi ring sor :
- ha. Ngawaliang wit sane karusak miwah prabia sane kapocolang yaning wawalungane ngeleb tur ngarusakin tatanduran anut lokika prajuru.
 - na. Cacaron, yaning wawalungan jantos ngaletihin khayangan utawi pamerajan.
 - ca. Keni pamidanda manut parareman Desa/Banjar Pakraman.
 - ra. Taler wawalungan inucap kengin kataban manut tatacara :
 - 1. Sang polih naban patut masadok ring prajuru Desa/Banjar.
 - 2. Sasampune kaparitatas antuk prajuru, wenang wawalungan inucap kasawenin.
- (5) Sang sane madruwe wawalungan ngeleb patut:
- ha. Nawur prabia ring sang naban manut panglokika prajuru.
 - na. Naur pamidanda ring banjar manut parareman.
- (6) Prade sang naban sasampune 15 rahina nyadokang ring prajuru taler tan wenten mariangken wawalungan inucap kengin kadruwenang.

Pawos 36

- (1) Tan kawenang ngangon ring :
- ha. Palemahan kahyangan/parhyangan utawi ring palemahan setra.

na. Ring tanah Desa/Banjar utawi ring paabianan krama sewosan.

- (2) Prade wenten mamurug kakeniang pamidanda manut parareman utawi maduluran cacaron yaning ngangon ring palemahan Kahyangan /Parhyangan.

Kaping 5

Bhaya Pawos 37

- (1) Sapari indik bhaya wenten bacakan Panca Bhaya luire :
- ha, Jiwa bhaya minakadi kepet patinnyane, kabaak.
Kakaninin, taler mamunyah jantos ngawetuang wicara,
makamiwah ngelampahang Narkotika, obat-obat
terlarang (narkoba) lan sapanunggilnya.
- na. Arta bhaya minakadi kapandangan/kamalingan.
- ca. Geni bhaya (katunuan) upami umah puwun.
- ra. Er bhaya (belabar) anyudang embah.
- ka. Dura cara ring agama.
- (2) Sang manggihin sahanan bhaya patut mapitulung manut pawos 25 (3) tur sang mayanin patut kadanda sekala niskala mekadi prabiya patibejampi, saha pamerayascita.
- (3) Jiwa bhaya inucap mawastu kali suara ring pajagatan Desa Pakraman Ubung, luire sane kawastanin:
- ha. Siligawe, jatma tua miyegan ring anak alit, sane tua patut kadanda manut pararem.
- na. Angeludi wirang, jadma muani ngiyegin kurenan timpal tur mamisuh matigtig, jatma muani inucap kadanda

merayascita, tur yening tan mamisuh keni pamidanda manut pararem.

ca. Wak dusta, jatma miyegan salah sinunggil misuhin keni pamidanda manut parareman, tur merayascita sang kapisuhin inucap.

ra. Danda parusia, katibakang ring jatma sane miyegan asiki mamogol, asiki magagawan tur ngawetuang kanin, danda inucap manut parareman miwah patibejampi.

ka. Keni pamidanda pamerayascita miwah gung arta manut parareman prade wenten salah sinunggil jatma nimpug antuk bacin lan kali suara sewosan.

da. Mamunyah nyantos ngawinang biuta saha ngelampahang/ ngalimbakang Narkoba lan sapanunggalnyane, patut keni pamidanda manut pararem.

(4) Prade ring Desa Pakraman kahanan jiwa bhaya, patut desane ngawentenang bhuta yadnya tur sang mayanin katur ring sang ngawa wenang.

Pawos 38

1. Sang manggihin sahanan arta bhaya, patut ngulkul mapitulung manut pawos 25 utawi sang kapandungan atur supekta ring prajuru sane pacang nimbangin tur mutusang ring dusta inucap

ha. Sajawaning numusang ring sang ngawa rat taler ngeniang pamidanda ngawaliang wit.

- na. Keni pamidanda nikel prade teer ngamaling lintangin ring apisan.
- ca. Maweweh panyangaskara prade ngamaling barang sane sinanggeh suci, katibakin pamidanda panyudamalan Desa/Banjar manut parareman.
- ra. Prade wenten jatma ngamalingin padruwen Desa/Banjar kakeniang pamidanda manut parareman saha patut ngawaliang wit.

(2) Luwir pratingkahing ngamaling :

- ha. Maling patra, prade jadma mamaling surat/ilikita hutang piutang, keni pamidanda manut parareman, paling akedik makuweh utangnyane.
- na. Maling panca mulia, kakeninin arep ring jadma sane ngamaling sakaluiring bibit (binih).
- ca. Amiyak pager arang, kawastanin prade jadma ngamaling munggah tembok utawi ngerusak tembok.
- ra. Maling kalaku, kawastanin prade wenten jatma sane ngambil sarwaning barang-barang, ring katarane wawu mapajar ngidih, kadanda manut pangangan barang sane kaambil, saha ngawaliang barang inucap.
- ka. Maling tan olih, kawastanin prade wenten jatma sane ngaranjing ring pakarangan tan asadu, keni pamidanda manut pararem.

(3) Pratingkahe mapailon ring sang dusta kabawos :

- ha. Rurom, prade wenten jatma sane ngamanggihin anak ngamaling tan nyadokang, kapatut nyane kadanda sekadi dandaning maling.

- na. Angiket sukaning wangke, prade wenten jatma sane mapailon ring dusta, tur sampun uning ring kacorahan inucap kantun ngarumrumin, jatma inucap kadanda manut pararem.
- (4) Yaning wenten jatma ngaranjing ring kakubon wiadin pakarangan rikala suwung mawastu sang madrebe karang kaicalan, wenang jatma inucap katuwekang antuk madewa gama (madewa saksi) ring pura Desa utawi Bale Agung. Pelaksana jatma sane ngaranjing kakakubon tan asadu kawastanin angungkabi lawang,
- (5) Mangda tan kasinanggeh manut ring ajeng, asing-asing ngaranjingin kubon jadma sios patut:
ha, Matengeran suara (makaukan).
- na. Nyantos sang nruwenang karang rawuh utawi masadok ring pangapit pinih nampek, maka buatan pangeranjinge.
- ca. Pamedal karangnya kadagingin sawen, maka cihna wenten pangarah rikalasuwung.

Pawos 39

- (1) Sang sane manggihin Gni bhaya (katunuan) utawi anyudang embah/er bhaya patut ngulkul mapitulung manut pawos 25
(3) muah katedunin antuk sahanan ayahan saha gagawan manut dudonan.
- (2) Sang dura cara ring agama macihna anut Tri Premana (saksi, ilikita, bukti) wenang jatma inucap kadanda manut paruman.

Kaping 6
Panyanggran Banjar
Pawos 40

- (1) Krama Desa rikala nangun yadnya suka-duka kengin nunas panyanggran banjar, upami sajeroning pitra yadnya, manusa yadnya, ngingsirang wawangunan utawi sane siosan.
- (2) Panyanggran banjar kamargiang manut dresta miwah pararem Banjar soang-soang.
- (3) I Krama Banjar kaaturin pangu anut wibuh kancit upacaraane.

CATURTHAS SARGAH
SUKERTA TATA AGAMA

Palet 1
Indik Dewa Yadnya
Pawos 41

- (1) Palinggih utawi panyiwian sawewidangan Desa Pakraman Ubung luire:
 - ha. Kahyangan Tiga minakadi Pura Desa, Puseh lan Dalem,
 - na. Kahyangan Prajapati,
 - ca. Pura swagina minakadi Ulun Suwi, Melanting lan Pura Kali pangi,
 - ra. Pura Pedadian/Paibon/Pamaksan, Pemerajan Banjar miwah pamerajan soang-soang krama desa.

(2) Patirtan soang-soang Khayangan inucap ring ajeng, sekadi ring sor :

ha. Ring Pura Desa rikala Saniscara Kliwon wuku Kuningan.

na. Pura Puseh ring Saniscara Kliwon Wuku Kuningan.

ca. Ring Pura Dalem Alas Harum, Waraspati Umanis Dungulan.

ra. Ring Pura Dalem Penataran rahina Saniscara Pon
Dungulan.

ka. Ring Khayangan/Prajapati Klod, Buda Kliwon Paang.

da. Ring Khayangan/Prajapati Kaja, Saniscara Kliwon Landep.

ta. Pura Ulun Suwi ring Purnamaning Sasih Kapat.

sa. Pura Melanting (Pasar Desa) ring Purnamaning Sasih Kasa.

wa. Pura Kalipangi ring Buda Wage Kelawu

la. Pura Padadian/Paibon/Pamaksan: kasukserah ring sane
ngamong soang-soang.

ma. Pura/Pamerajan Banjar : manut soang-soang Banjar.

ga. Pangebekan ring Pura Desa/Bale Agung rikala Saniscara
Kliwon Wariga. ;

ba. Rikala Ida Betara jaga melasti nemonin sasih kasanga;
Padadian/Paibon/ Pamaksan sane pacang nyarengin
kasegara, mangda ngariyinin pamargin Ida Betara
Khayangan Tiga, teges ipun; sane mamargi dumunan, Ida
Betara Padadian/Paibon/Pemaksan, ngiringang Ida
Betara ring Dalem (kelod/kaler), Ida Betara ring Puseh,
pinih unkur Ida Ratu Gede Desa.

Yaning mamurug kecap ring ajeng, patut kabawosang ring
paruman Desa Pakraman Ubung.

- (3) Pangaci ring Pura inucap, kamargiang nista, madya, utama; manut ring kawentenan lan pararem saha panugrahan Sang Sulinggih, utawi saking pemangku sane dados pangemong pura punika.

Pawos 42

- (1) Sane tan kalugra ngeranjing ring Khayangan Desa luire :
- ha. Jadma luh sebel kandel (ngeraja sua), madruwe oka karuron, manut sengker;
 - na. Jadma cuntaka sangkaning madruwe alang kapatian sengker kapastikayang antuk pamutus/pararem manut linggih sang kacuntakan, sekadi ring sor puniki ;
 - 1. Ring Banjar, sajeroning durung maprayascita.
 - 2. Ring purusa sajeroning 12 dina mangda makelud.
 - ca.
 - 1. Jadma istri (biang) 42 dina yening sang rare padem nyarengin ari-ari.
 - 2. Jadma Istri (biang) sane maduwe oka sadurung 42 dina
 - ra. Sahanan jadma petita (pianak bebinjat), wong beling kasanggamen tan sinangaskara, wong mamitra ngalang miwah cendala siwosan.
 - ka. Sato saluwir wawalungan suku pat sajawanin rikala mapapada.
 - da. Sahanan wit sane sinanggeh letuh manut agama (tulang, getih, bok) saluwir wiwitan wangke/watang, layudan pitra yadnya miwah makutu, masisir, (masuri) lan candala sewosan.

(1) Pretilaksanane tan wenang ring pura.

ha. Mamisuh kalih mawicara sane ngaletuhin manah utawi pikayun miwah ngametuang biya para ring sang miragiang.

na. Mejajal/magerengan, bilih-bilih yaning jantos kanin/metu rah.

ca. Makobetan, masesenengan, masanggaman, mabacin lsp.

ra. Manyonyoin

ra. Mungguh tedun palinggih, sajawaning pituduh prajuru/pemangku.

(3) Sang amurug kecape ring ajeng kadanda manut pararem.

Pawos 43

(1) Soang-soang Pura ring sawawengkon Desa Pakraman Ubung kawentenang Pemangku.

(2) Ngadegang Pemangku manut dudonan :

ha. Pemangku saking katurunan/ngawaris,

na. Nyanjan mapinunas madasar upakara yadnya ring pura

ca. Pilihan Desa/krama panyungsung, manut pararem

(3) Sane tan wenang anggen pemangku.

ha. Ceda angga, luire : peceng, perot, cunghih, lsp.

na. Kageringan luire : sakit ila, ayan, buduh, lsp.

ca. Muah sane lianan manut pararem.

(4) Prabeya ngawintenang pemangku ring :

ha. Pura Desa, Pura Puseh, Pura Dalem lan Prajapati kasanggra antuk krama Desa.

na. Pura Swagina (Kalipangi, Melanting, lan Ulun Suwi) kasanggra antuk Krama Desa.

ca. Pura Padadian / Paibon / Panti kasanggra antuk panyungsungnyane soang-soang.

(5) Pemangku kagentosin riantukan :

ha. Lina.

na. Pinunas ngaraga manawi kageringan lsp.

ca. Kawusang antuk krama manawi malaksana sane tan patut (asta dusta).

Pawos 44

(1) Swadarmaning pemangku.

ha. Ngenterang upakara upacara piodalan ring khayangan desa utawi ring soang-soang kakubon krama desa.

na. Ngantebang baktin krama minakadi : panauran-panauran, pamintonan, paneduhan, panganggihan, lsp.

ca. Tan wenang salab sulub, yan mamurug wenang pemangku inucap nyepuhin raga.

ra. Prade sinalih tunggil pemangku kapialang utawi cuntaka, kengin kagentosang antuk pemangku siosan utawi nuwur Sang Sulinggih.

ka. Samalih yan sampun pemangku ngayah tigang rahina ring pura, kancit wenten kulawargannyane lina,

pamangku inucap tan keneng cuntaka, sakewanten
pamangku tan budal selami piodalan.

da. Mareresik, nitenin, lan nuntun kasucian khayangan (pura)
amongane.

ta. Patut ngamanggehang sesananing pamangku, luire tan
wenang ngamargiang Panca Ma (madat, madon,
mamunyah, mamotoh lan mamaling).

(2) Ngemargiyang penauran lan sane mapenauran patut
masadok ring prajuru mangda keilikitayang tur kaungguhang
druwen desa luire:

ha. Panauran upacara upakara wawalian (babalihan).

na. Panawuran laluwes, mule-mule lsp.

ca. Sesari - sesari lsp.

ra. Sajawaning panawuran pejati lan sane siosan punika,
sane mewali kalungsur kengin kapuputang antuk
pemangku kemanten.

(3) Ngenterang yadnya madya, bilih-bilih mautama kengin nuwur
sulinggih pacang muput piodalan inucap lan pemangku
maka panyanggra.

(4) Pemangku Khayangan Tiga kengin :

ha. Nibakang panugran ring pemangku para sanak lan krama
desa manut pararem.

na. Polih panyepuhan prade katiwakin antuk sinalih tunggil
krama saking krama sane niwakin, yan jati-jati tan wenten
kaiwangan; sakewanten prade mabukti
kaiwangannyane patut nyepuhin raga antuk prabeya
ngaraga.

- ca. Yening sindih tunggil pemangku Kahyangan Tiga amangguh alangan, kengin katampa utawi kagentosin antuk pemangku Kahyangan Tiga siosan.
- (5) Yening wenten padruwen Pura sane kawon wiadin ical pemangku mangda mapisadok ring Prajuru.

Pawos 45

Pikolih utawi petiyas pemangku Khayangan Tiga :

ha. Sasarin arta panauran, kapinaro tiga sekadi ring sor :

1. Pemangku asiki.
2. Desa/Banjar asiki.
3. Sang madruwe karya asiki.

na. Upon palaba carik miwah tegal manut pararem

ca. Luput saking ayah-ayahan mekadi.

1. Mambang ring setra.
2. Magebagan ring jero sang seda.
3. Nyiramang layon.
4. Nyandang layon utawi watangan.

ra. Luput manut pararem Banjarnya soang-soang.

ka. Polih wantuan saking Desa Pakraman yening katiben sungkan nyantos ngamar ring rumah sakit, pawilangan nyane manut perarem.

da. Sewosan ring petias ring ajeng pemangku kahyangan tiga sane seda polih patis lan panyanggran Desa Pakraman (manut perarem).

Pawos 46

- (1) Swadarmaning panyungsung utawi krama desa ritatkala piodalan ring Pura utawi Pura Khayangan Tiga, patut:
 - ha. Mamedek ngaturang bakti, sajawaning wenten kapialang.
 - na. Ritatkala mamedek mangda mabusana adat jangkep tur nganufin sesana.
 - ca. Ritatkala ngayah mangda mabusana (mawastra lan nyalempot).
 - ra. Siosan kadi ring ajeng nenten kalugra, sajawaning sampun pituduh prajuru.
- (2) Yening wenten wong dura Desa Pakraman Ubung jagi nunas Tirta Pamuput Karya ke Pura Kahyangan Tiga, patut matur uning ring Prajuru saha ngaturang batu-batu mapawilangan manut pararem.

Pawos 47

- (1) Ayah-ayahan saha prabiya sajeroning pujawali lan wewangunan ring pura Kahyangan Tiga lan Prajapati kawantu olih Desa Pakraman (rincikane wenten ring perarem).
- (2) Ayah-ayahan saha prabiya sajeroning pujawali lan wewangunan ring pura Swagina kasanggra antuk pangempon/pangemong nyane suang-suang.
- (4) Ayah-ayahan saha prabiya sajeroning pujawali lan wewangunan ring pura Kahyangan Prajapati Kaler lan klod

kasanggara antuk pangempon/pangemong nyane suang-suang .

- (5) Ayah-ayahan saha prabiya sajeroning pujawali lan wewangunan ring pura Swagina kasanggara antuk pangempon/pangemong nyane suang-suang.
- (6) Prabeya ngaturang aci ring Khayangan Prajapati kamedalang antuk Pamangkunyane.

Palet 2

Indik Resi Yadnya

Pawos 48

- (1) Sang sane pacang mapudgala (madwijati), patut masadok ring prajuru Desa, miwah nunas panugran ring sang rumawos (Parisada utawi Kantor Kementrian Agama).
- (2) Prajuru inucap patut sareng nureksa nitenin, mangda sulur kalih pamargine jati-jati manut kecaping agama, makadi kaceda angga lsp, saha nyaksinin pamargin upacaraannyane.
- (3) Salanturnyane Prajuru Desa Pakraman patut digelis ngentosin aran Sang Diniksan manut panugran Sang Nabe, saha kailikitayang tur kasiarang ring paruman Desa/ Banjar.
- (4) Sang Sulinggih patut ngriyinin ngrayonin ring wawidangan Desa Pakraman Ubung, sasampune wawu muputang yadnya ke jabar jagat utawi ke dura desa.

Pawos 49

- (1) Sajawaning Pemangku, sang pacang mawinten maka buatang pacang mamargi nyonteng, dalang, sakaluwiring pacang ngenterang yadnya patut masadok ring Bendesa Pakraman.
- (2) Prajuru Desa patut nitenin tur wenang ngalangin prade kaciha nyasar kakecap miwah drestane tur sareng nyaksinin upacara miwah salantur ipun nyiarang ring paruman Desa/Banjar, tegap rauh ring wates kawenangan pangenter yadnyane.

Pawos 50

- (1) Krama Desa/Banjar katuntun antuk Prajuru patut sareng nitenin mangda sahanan yadnya sane kawentenang kaicen pamuput olih Pandita utawi Sang Pinandita (mangku, dalang, sakaluire) manut kawenangannyane soang-soang.
- (2) Prajuru patut nuntun saha ngamanggala krama Desa/Banjar mikukuhin kasucian linggih para wikune ring wawidangan Desa Pakraman Ubung.
- (3) Prajuru Desa patut ngaturang dana punia.

Palet 3

Indik Pitra Yadnya

Pawos 51

Dudonan Pamargin Pitra Yadnya

- (1) Pangupekaraitsang lampus.

- ha. Mendem utawi ngeseng, maka cihna makingsan ring ibu pertiwi utawi makingsan di geni, salami nuptupang prabeya.
 - na. Atiwa-tiwa utawi upacara pangabenan, tur sane kengin kaabenang risampun ketus untu. Prade durung ketus, ngawit saking yusa tigang sasih patut kaabenang "Ngelungah".
 - ca. Yaning sane seda Pemangku, patut kaabenang.
- (2) Sarana usungan sane dados kaangge ritatkla sinalih tunggil Krama Desa Pakraman Ubung lina tur kaabenang (kaatiwa-tiwa) manut panugran Sang Sulinggih sane muput.
 - (3) Upacara-upacara pitra yadnya riwusan kaabenang mawasta atma widana.

Pawos 52

Swadarma lan tategenan prade wenten krama Desa lina.

- (1) Sang kaduhkitan patut :
 - ha. Masadok ring prajuru tur nunas tatimbang indik pamargi ring prajuru Banjar soang-soang.
 - na, Nguningang ring prajuru banjarnyane, prade kapendem utawi Ha abenang,
 - ca. Makarya biakawonan/prayascita genahang ring jaba setra, rikajaning krama Banjar sampun puput karyan banjar ring setra.
- (2) Swadarmaning Desa/Banjar.

- ha. Nepak kulkul manut pawos 25 (3)(semeng sawetara jam 5,30, utawi tengah rahina sawetara jam 12.30), pinaka kasiaran ring krama banjar.
- na. Sajeroning kapatian krama Banjar madruwe kapatutan karya ping pat, sakadi ring sor puniki:
1. Majenukan Krama Banjar istri.
 2. Matektekan Krama Banjar lanang.
 3. Nusang, Krama Banjar lanang - istri.
 4. Mendem utawi ngeseng ke setra, Krama Banjar lanang - istri.
- ca. Indik ngaringkes/nusang lan mendem sawa mangda kamargiang nyoreang sawetara galah dauh (jam) 16.30.
- ra. Indik ngeseng sawa, mangda kamargiang tengah rahina sawetara dauh (jam) 12.30.
- ka. Indik galah inucap ring ajeng patut katinutin, sajawaning wenten pariindikan siosan.

(3) Panyanggran banjar salanturnyane :

- ha. Soang-soang krama nedunin patus beras. Utawi jinah manut pararem Banjar soang-soang.
- Na. Krama Banjar Pakraman lanang-istri sajeroning babanjaran ngambil pakaryan manut dresta:
1. Sane lanang, makarya pamereman/asagan kalih nusang.
 2. Sane istri, matatulung majajahitan ngaryanin pabersihan/ saupakaranin padem lan majenukan.

3. Krama lanang lan istri sareng ngarombo rikala pangutangan saha soang-soang mabusana adat, sanistane masalempot lanangne, masasenteng krama banjar istrine, tur wawu dados budal sasampune wenten pawangsit saking prajuru.
- Ca. Pamargin sawa miwah upakarane mangda dabdab antar tan kengin masuara gora (ngarap watang).
- Ra. Yan prade wenten sinalih tunggil krama katiben kapatian doh nyan tan lintang ring 6 (enem) kilometer, krama banjar patut ngarereh sawane punika,
- ka. Yan wenten sinalih tunggil krama banjar jagi mudalang sawa kadura desa krama Banjar nenten kapatut nyarengin, sajawaning wenten bawos sang madruwe alang ring prajuru.
- Da. Krama Desa utawi banjar sane pacang ngaben (kremasi) kadadosan, yaning wenten pikobet utawi kapiambeng ring Desa Pakraman.
- (4) Yaning prade sawane malelet, kawentenang pagebagan manut paetangan Banjar soang-soang.
- (5) Prade kaputungan patut sawane kaupakara antuk Banjarnyane.

Pawos 53

Pamargin Pamendeman/Pangesengan

- (1) Nganutin padewasan:
 - ha. Tan kalugra mendem/ngeseng.
 1. Ritatkala tetoyan ring Khayangan Tiga.

2. Ritatkala tetoyan ring Khayangan Prajapati.
3. Ritatkala tetoyan ring Banjar soang-soang.
4. Nemonin Buda Kliwon Sinta (Pagerwesi).
5. Nemonin Buda Kliwon Dungulan (Galungan).
6. Nemonin Purnama-Tilem.
7. Ritatkala wenten sane kawastanin makirim wangke.
8. Sajeroning Ida Betara kantun nyejer ring Bale Agung utawi ring Khayangan Tiga.
9. Ritatkala wenten kala gotongan lan semut sadulur.

na. Yening wenten alang kapatian ngeniang rahina inucap ring ajeng, Banjar sane polih giliran ngaturang aci ring Khayangan Tiga, tan kapatut malaksana upakara sawa, sadereng wusan ngaturang aci punika.

ca. Yening krama Banjar sane polih giliran ngaturang aci ring Pura Desa katiben alang kapatian, palaksananing aci punika mangda kagentosin antuk krama Banjar siosan.

(2) Nganutin genah ring setra :

ha. Setra babajangan (setran rare) genah mendem sawa wong rare sane durung mayusa 3 sasih (asambutan).

na. Setra Gede, genah mendem sawa ngawit mayusa asambutan ngantos salantur nyane.

ca. Mendem sawa ring setra, manut ring rarempon babanjaran miwah sapanungalniya.

(3) Pamargin pamendeman/pangutangan:

ha. Yening pacang mendem utawi pengabenan sawa lintangan ring adiri, ring setra asiki, tur tunggal rahina,

patut sawa sane nampekan ring setra kamargiang riin (tan wenang ngalangkar watang). Asapunika taler pamargine ring pangutangan ngaben.

na. Prade pacang ngamargiang upacara mendem sawa miwah upacara pangabenan ring rahina tunggal tur tunggal setra, mangda upacara pamendeman kamargiang dumunan.

Ca. Yening wenten layon sane kapendem utawi ngaben/kaprataka rahina mangkin benjangne tan kadadosan mendem/maprataka sawa, mangda tan kaucap makirim layon,

(4) Ring setra tan kadadosan.

ha. Makarya undung - undung (kuburan permanen) sakewanten dados makarya pinget makacihna panyuratan sang lampus. prade wenten kuburan permanen ring setra sene kabawos ngalikadin olih prajuru, patut kagubar olih sang madruwe. Yan tan tinut patut kagubar olih krama Desa.

na. Mendem/ngeseng sawa krama sane durung madesa pakraman Ubung, sajawaning sane sampun kalugra antuk prajuru Desa/Banjar, majalaran antuk pananjung batu, sane akwehnyane manut pararem Desa.

(5) Kalugrayang mendem manut paetangan :

ha. Anak alit durung tumbuh untu, patut kapendem premangkin, saha nenten ngawilangin dewasa.

na. Pamendeman rikala piodalan sane kabawos gelah dadi antuk tata cara amandung tanpa suar, mamargi wengi saha nenten maupacara upakara premangkin.

(6) Panataan setra.

ha. Siosan ring setra nenten pisan kadadosang mendem utawi ngeseng sawa, sajawaning layon Sang Sulinggih.

na. Tan dados nginepang bambang/pamalungan ring setra.

ca. Krama Desa/Banjar patut mamiara, ngamecikang setra sane dados rarempon-nvane.

Pawos 54

(1) Prade lina sangkaning salah pati ulah pati, kapangawan lan sakancannyane kengin kabakta budal tur kaprateka kadi patut, risampun kamanggala antuk upakara banten panebusan lan pangulapan.

(2) Jadma lina sangkaning sakit ila, gering agung lan sapanunggalhyane, sasampun kaupakaren manut pawilangan (1) ring ajeng, mangda kageseng ring setra sane kapatutang olih Bendesa Pakraman, tur kapatutang antuk Sulinggih sane muput.

(3) Prade wenten sinalih tunggil krama roban kulawarga manut angka (2) ring ajeng, sadereng sang kageringan lina patut di gelis kasadokang miwah mapatiba jampi usada Dokter.

(4) Yaning wenten sinalih tunggil krama desa sane lampus sakadi kecape angka (2) ring ajeng patut nganutin tatacara nyiramang layon manut daging perarem.

- (5) Sawan deha, teruna, kapatut ngangge rurub kuning, saha yaning durung mapandes mangda sawane katatahin riin, wawu kengin kapendem/kaaben (utawi manut dresta warga soang-soang).
- (6) Prade sang istri seda ngadut manik, tan wenang pendem/geseng sadereng bobotan embas mawastu maurip utawi lina.
- (7) Pamargi siosan :
- ha. Prade wenten jadma dura desa kacunduk padem ring sawawengkon Desa Pakraman Ubung mangda digelis kauningayang ring sang mawangrat.
- na. Prade kahanan wong padem ring pakarangan, tegalan, lan sapanunggalnya patut sang madruwe sawa marayascita genah inucap.

Pawos 55

- (1) Kacuntakan sangkaning padem
- ha. Mungguwing kacuntakan sekadi ring sor :
1. Saking babanjaran selami durung maprayascita.
 2. Prade atiwa-tiwa nyeka (ngerit) saking ngulapin ngantos tigang rahina (pelebar) buntas
- na. Sang madruwe layon
1. Durung kepus udel selami petang dasa kalih rahina.
 2. Sampun kepus udel ngunggahang, selami roras rahina utawi manut dresta dadia soang-soang.

- ca. Saking sulur kilitan pakeluargan, tunggal sanggah gede,
Pura sanak, ngawit saking mapendem nyantos roras
rahina, utawi manut dresta dadia soang-soang.
 - ra. Yaning pacang ngawangun yadnya, sawane mangda
kaprateka/mapangentas saha makelud.
 - ka. Krama Banjar sane ngawidangin Tunon, Balai Pengorong
taler kabawos sebel pateh sekadi sekan sawa.
- (2) Sane tan keneng cuntaka :
- ha. Sang Sulinggih lan Pinandita
 - na. Rikala ngawangun yadnya sane kabawos galah dadi.

Pawos 56

- (1) Atiwa-tiwa (pangabenan) wenten kalih soroh :
 - ha. Nyawa Resi (nyuwasta gni).
 - na. Sawa prateka.
- (2) Nyawa Resi kalaksanayang antuk pangawak (lalang) duaning
tan ngagah galih utawi menawi sawane tan kakeniang.
- (3) Sawa prateka kalaksanayang antuk ngagah galih, utawi
mrateka sawa bahbangun.
- (4) Dudonan pangabenan sekadi ring sor
 - ha. Ngaskara sawa bahbangun, ngagah utawi nyawa resi.
 - na. Pangutangan antuk ngeseng sawa.
 - ca. Pakiriman/panganyutan.
- (5) Krama Banjar sawawengkon Desa Pakraman Ubung, tan
kalugra ngamargiang upacara ngaben, ritatkala wenten
Karya Madudus ring Khayangan Tiga, ngawit saking
nyekung/nyengker dewasa ngantos nyineb.

- (6) Ring indik pacingkrem kalih pangu ring Banjar saking sang madrebe karya, nginutin wibuh kancit karya, manut pararem Banjar soang-soang.

Pawos 57

- (1) Panamayan pangabenan kalaksanayang sanistane 5 (limang) warsa, prade wenten sane jagi nyeka (ngerit) kamargiang manut pararem.
- (2) Yen sampun langkung ring 5 (limang) warsa tan kaaben, Desa Pakraman patut ngawentenang patinget pangabenan /pangeritan tur dados kamargiang manut kasidan maduluran daging pararem.
- (3) Tata sulur pangabenan manut papendeman ring ajeng saha wenten maweweh malih:
- ha. Sang madruwe karya kasanggra antuk Krama Banjar Pakraman risampun wenten pasadok ring prajuru.
- na. Panamiau majeng ring Banjar sane nyanggra inucap manut dresta Banjar soang-soang.

Palet 4

Indik Manusa Yadnya

Pawos 58

- (1) Manusa Yadnya inggih punika, upacara, dharmaning manusa ngawit saking patemoning Kama Petak kalawan Kama Bang sajeroning garba (waduk) ibiang ngantos lina riwekas.
- (2) Upacara kadi ring ajeng madudonan sekadi ring sor :
- ha. Magedong-gedongan.

- na. Duk sang kama reka (rare) wawu medal.
- ca. Kepus udel/puser.
- ra. Ngalepas haon (risampune rare mayusa 12 rahina),
- ka. Akambuhan (42 hari).
- da. Tigang sasih (nyambutin).
- ta. Pawetuan ri sampun 6 sasih.
- sa. Ngempugin rikala wawu tumbuh untu.
- wa. Makupak/maketus upakara sesayut pengerti suara.
- la. Mungguh deha teruna (ngeraja wadone, ngembakin lanangne).
- ma. Mapandes/matatah.
- ga. Mawiwaha/madengen-dengen/masakapan.
- ba. Mawinten, nunas panugrahan Sang Hyang Aji Saraswati.

- (3) Upacara soang-soang ring ajeng, nista, madya, utama, manut Sastra Agama saha Catur Dresta (Sastra Dresta, Kuna Dresta, Loka Dresta, Desa Dresta) Desa Pakraman Ubung.

Palet 5

Indik Bhuta Yadnya

Pawos 59

- (1) Bhuta yadnya inggih punika, upacara pabiyakala ring Pertiwi lan Kahyangan, sarwa prani saha upakara katur ring Panca Maha Bhuta.
- (2) Upacara pabiakala ring sarwa prani:

- ha. Tumpek Pangarah/pangatah/uduh, nemonin Saniscara kliwon wuku wariga, upacara majeng ring sarwa tumuwuh.
- na. Tumpek Kandang/Uye, nemonin Saniscara kliwon Uye upacara majeng ring sarwa ingon-ingon (ubuh-ubuhan).
- ca. Upacara pakalan-kalan manusa manut wiguna, ketah kabawos pabiakalan.
- (3) Upacara upacara pabiakalan ring Pertiwi miwah Khayangan lan ring babuthan, kawastanin macaru.
- (4) Pacaruan inucap ring ajeng nista, madya, utama, manut wiguna kadi ring sor :
- ha. Eka sata.
- na. Panca sata.
- ca. Panca sanak.
- ra. Panca kelud.
- ka. Resi gana.
- da. Tawur, miwah sane siosan.
- (5) Sajawaning inucap ring ajeng, kawentenang upacara yadnya:
- ha. Majot-jotan (masaiban/yadnya sesa) nyabran wusan ngarateng.
- na. Masapu rapuh (pangresikan) rikala pacang wenten piodalan ring Priyangan.
- (6) Ring nyabran sasih kaenem, kawentenang pacaruan sasih magenah ring Catus Pata (pempatan agung), antuk Caru Panca Sanak saha Panyamblehan bawi butuan.

Pawos 60

Upacara/upakara Tawur Kasanga

- (1) Majeng ring Ida Batara patut:
 - ha. Pananggal ping roras sasih kasanga Ida Batara lunga ke Bale Agung.
 - na. Palelastian:
 1. Pananggal ping telulas sasih kasanga, melastiang Ida Batara ke Segara Kuta.
 2. Ring Tileming ke Sanga, nunas palastian ke Taman (Ulun Suwi).
- (2) Upacara/upakara kaetang antuk Prajuru :
 - ha. Upakara/upacara padatengan, pamereman, panyucian, pacaruan ring Bale Agung.
 - na. Upakara/upacara palelastian ring Segara.
 - ca. Upakara/upacara pamendak ring panggungan.
 - ra. Upakara/upacara Tawur Kasanga.
 - ka. Upakara/upacara melasti ring Pura Ulun Suwi.
 - da. Upakara/upacara paecan ring Bale Agung.Palaksananing inucap ring ajeng manut pararem.
- (3) Prajuru Desa Pakraman mangda nyayagayang; juru songsong/pundut, wali lan tatabuhan.
- (4) Krama Desa Pakraman Ubung, patut sami ngiring ka Segara, tur prade cedok tan kapiambeng keni pamidanda, manut parareman Banjar soang-soang.
- (5) Upacara Tawur Kasanga manut kadi ring sor :
 - ha. Ring Tileming sasih Kasanga kawastanin tawur kasanga, kadulurin antuk pangrupukan pacang magpag rahina panyepian benjangne.

na. Pacaruan manut genah mekadi:

1. Ring Desa manut parareman, sanistane Pancasata.
2. Ring Banjar, Pura, caru ayam brambun (Ekasata).
3. Ring lebu (pamesuan) soang-soang krama, segehan manut arahan, saha nanceb sanggah cucuk.

ca. Galah pangerupukan sekadi ring sor :

1. Ring tepengan ngrupuk nyoreang tan kengin langkungan ring tengah wengi.
2. Palaksananing pangrupukan siwosan ring Desa/Banjar taler kalaksanayang ring soang-soang wisma masarana antuk obor/prakpak lan masuwi (ketah kawastanin mabuu-buu).

Pawos 61

(1) Upacara rahina Nyepi/sipeng manut catur pabraton sakadi ring sor :

ha. Amati geni, tan kengin maapi-api sajawaning :

1. Sang madruwe rare dereng tigang sasih, ring genah rarene.
2. Sane matepetan ring genah sang sungkan.
3. Sang sane nruwenang layon.

Sahananing pariindike ring ajeng mangda katumusang ilikita ring Bendesa.

na. Amati karya. tan kengin nyambut karya.

- ca. Amati lelungan (lampah), tan kengin medal kamargine, sajawaning: pecalang/ petilik Desa/Banjar, utawi sang sane polih wak-wakan olih prajuru Desa/Banjar.
- ra. Amati lelanguan, tan kengin masuara gora, meoneng-oneng/mepelalian.
- (2) Prade amurug brata panyepian, keni pamidanda manut parareman, kalaksanayang antuk Prajuru Desa/Banjar, manut pasadok saking pacalang/patilik Desa/Banjar.
- (3) Riwus rahina nyepi kawastanin ngembak geni mapiteges pangelebar yoga semadi kadulurin antuk pangaksama soang-soang krama Desa Pakraman Ubung, maka cihna pangawit icaka warsa.

PANCAMAS SARGAH SUKERTA TATA PAWONGAN

Palet I

Indik Pawiwahan

Pawos 62

- (1) Pawiwahan, inggih punika patemoning purusa lan predana malarapan panunggalan kayun suka cita, kadulurin upesaksi sekala miwah niskala.
- (2) Pamargin pawiwahan luire :
- ha. Papadikan, maduluran antuk suka cita sangkaning paigum pakayun kulawarga maka kalih;

- na. Ngarorod (pawiwahan mamandung), marangkat riyin wawu ka kruna yang;
 - ca. Nyentana (pekidih), Inggih punika pawiwahan sang lanang kasinanggeh predana.
 - ra. Yaning wenten pawiwahan siosan sakadi kecape ring ajeng patut kapaiguman dumun ring sajeroning kulawarga purusa lan pradana saha kasaksinin antuk prajuru desa lan banjar.
- (3) Pidabdab sang sane pacang mawiwaha, patut:
- ha. Sampun manggeh daha teruna.
 - na. Sangkaning pada rena (tan kapaksa).
 - ca. Nganutin kecaping agama.
 - ra. Prade ngambil siosan agama, kamanggala antuk banten pamarisuda lan Sudhiwidani.
- (4) Pamargin pawiwahan inucap ring ajeng mangda taler nganutin Undang-Undang Panegarane miwah pasuara sane kamedalang antuk Guru Wisesa.
- (5) Sang amurug kecape ring ajeng prade manut tri premana, patut:
- ha. Tan manut angka (3) na, menawi kapaksa utawi kapelegandang, penganten kengin kapalasang, tur sang sane malaksana malegandang kadanda manut pararem;
 - na. Sang ngaruomin (ngicenin genah) pengantene saha tan masadok ring Prajuru Pakraman lan Dinas jantos arahina (24 jam), miwah sane nyarengin malegandang kadanda manut pararem.

Pawos 63

- (1) Parabian sane kawastanin patut ring Desa Pakraman Ubung manut kecape, pawos 62 (1) ri sampun maka cihna mekadi:
- ha. Pawidi-widanan sane kapuputang antuk Pandita utawi Pinandita;
 - na. Kasaksinin antuk Prajuru Desa/Banjar Pakraman lan Prajuru Dinas, saha kakeniang jinah upasaksi manut pararem;
 - ca. Ilikita panyaksian Guru Wisesa, manut kadi pasuaran Peraturan Perundang-undangan panegara Republik Indonesia.
- (2) Parabian sane kabawos tan patut :
- ha. Natab upakara saking papaksan;
 - na. Sinalih tunggil tan rawuh miwah tan wenten ilikita;
 - ca. Nenten wenten saksi miwah ilikita;
 - ra. Agamia gamana inggih punika pangambilan/pawiwahan sane tan patut riantukan nenten manut sasananing agama mekadi:
 - 1. Ngambil semeton wit ibapa/ibu.
 - 2. Ngambil semeton miwah semeton lian biang.
 - 3. Ngambil oka miwah oka kualon.
 - 4. Ngambil mantu miwah matua.
 - 5. Ngambil warang.
 - 6. Ngambil cucu saking mantu.

Yen prade wenten ngamargiang agamia gamana pangambilan punika patut kapalasang, semalih sang amurug patut ngawentenang pamarisuda Desa.

Pawos 64

Tata Caraning Pawiwahan

- (1) Sapasira ugi pacang ngawarangang pakulawarga patut masadok ring Prajuru, sane pacang maritatas manut tan manut kakecap pawiwahan.
- (2) Palaksanaan Papadikan:
 - ha. Nista, malarapan canang sari, sedah miwah lanjaran:
 - na. Madya, malarapan canang sari, sedah lanjaran, kopi, gula, sanganan, akeh nyane manut kawentenan sang madruwe lanang,
 - ca. Utama, malarapan Daksina, canang sari, sedah, lanjaran, kopi, gula, saha sanganan, kawewehin antuk busana sang istri, basan pupur makeh kedik nyane sara ledang sang madruwe oka lanang. Sasampune jangkep ring ajeng wawu dados karerehang padewasan pacang ngambil sang istri.
- (3) Palaksanaan Ngerorod:
 - ha. Reraman lanangne ngawentenang panglukuan (pejati) antuk duta, sa kirangnyane kalih diri, malarapan ilikita maka cihna sang kalih sampun pada tresna, saha tan kengin kasepan ring arahina.

- na. Risampun reraman wadone nerima pangelukuan patut masadok ring I Prajuru saha tan kengin kasepan ring arahina.
- ca. Prade sangkaning tan terima ring pangelukuan, reraman wadone :
1. Nenten kengin ngawirosaning duta napi malih macihna antuk suara gora/ kalisuara, wenang keluarga wadone kasisipang tur kadanda manut pararem.
 2. Kadadosang ngawentenang pangetut saha pamargine mangda katuntun antuk prajuru Desa/Banjar;
- (4) Sajeroning pakrunan patut:
- ha. Kamanggalain antuk geng pangampura arep ring reraman wadone.
- na. Kaigumang babawos idih pakidih (palegayan) arep ring pasewakan reraman sang ngidih saha pakerabkambene riwekas.
- ca. Taler kacihnayang mungging kapurusan utawi prade sentana rajeg kajejerang kapatut ngidih anak lanang.
- ra. Prade tan nerima pakrunan kamargiang papadikan jantos ping tiga.
- (5) Pakerab-kambennyane mapiteges upacara tinas apadang (puput) mapikuren, duaning manut sekadi ring sor :
- ha. Sajeroning kabawos ngambe (adung) kalaksanayang ring sekala niskala antuk sarana jajauman miwah pawidi-widanan;

1. Jejauman pinaka ngambe/ngadungang kayun soang-soang kulawarga wadone.
 2. Widi-widana pinaka pejati niskala matur uning wadone ring Pamerajan, prade tan nerima kengin ngaryanin panyawangan ring kakubon sang lanang.
- na. Sajawaning bawos kerab pelaksana ring sekala;
1. Antuk panyaksi krama Banjar dwaning kasiarang/kasobyahang mungwing kawentenan sinalih tunggil warga mawiwaha.
 2. Pamekas panyaksi Prajuru Pakraman lan Dinas tur kailikitayang.
- ca. Pakerab kambeyane inucap kamargiang; nista, madya, utama.

Pawos 65

- (1) Piteges pawiwahan patut sang lanang marabi adiri asapunika taler sawaliknya, sajawaning wenten pasubaya utawi paetangan sewos.
- (2) Prade wenten lokika sangraha, patut sang mobotang nyakapang wadone, yan tan manut raris katumusang ring sang Rumawos utawi Pengadilan Negeri tur yening kacihna manut tri premana jantos katiwakin pamidanda antuk sang Rumawos patut mariangken tur ngupajiwain embasan bobotan punika maka pratisentanannyane.
- (3) Prade dratikrama, paradara, mamitra ngalang, sane kabawos ngawinang cemer jagat Desa Pakraman Ubung, wenang

kasisipang tur ken i pamidanda saha upacaranyane Prayascita Durmangala.

Palet 2

Indik Palas Marabian/Nyapian

Pawos 66

- (1) Wusan mapikuren riantukan sinalih tunggil lina; mapiteges balu.
- (2) Palas marabian mawiwit wicara, macihna tan numus sukacitaning panunggalan idep sang alaki-rabi, tegesnyane nyapian.
- (3) Sang jagi palas marabian manut angka (2) ring ajeng, patut atur upeksa pailikita ring sang Rumawos utawi ring Pengadilan Negeri, Wastu finas pamuius kabawos palas/nyapian.
- (4) Sang palas marabian manut angka (3) ring ajeng sane sinanggeh purusa wenang ngawaliang sang istri maring wong tuannyane/kulawargannyane, lan salantur nyane nguningayang maring Prajuru Desa/Banjar Pakraman saha kasiarang kawentenan-nyane maring krama Desa/Banjar risajeroning paparuman. Saking kulawarga wadone mangda mamitang ring merajan pecak suaminnyane.

Pawos 67

Tata Cara Palas Marabian

- (1) Sulur palas marabian prade sinalih tunggil anasar laku, ceda angga, wirosaning laku, matilar tan pasadok, miwah setata wak parusia, tan prasida adung malih.
- (2) Yening wicarane katumusang antuk lanange, patut macihna :

- ha. Paradara utawi anasar laku;
- na. Sang istri amandel sanggama wiadin maambul-ambulan nyantos 6 sasih;
- ca. Istri ceda angka (tan prasida nyanggamen).
- (3) Yening wicarane katumusang antuk sang wadone, patut macihna :
- ha. Lanangne dratikrama;
- na. Wangdu;
- ca. Tan nyanggamen lan tan ngupajiwa nyantos 6 (nem) sasih.
- (4) Prade manut tri premana (saksi, ilikita, bukti), sang mawicara lanang wiadin wadone mekadi angka (2), (3) ring ajeng :
- ha. Parabian dados kapalasang;
- na. Pagunakayan polih pahan pada;
- ca. Pabekel/tatadan soang-soang kakuasa niri-niri, sakewanten warisan kakuasain olih purusa;
- ra. Ngaweruhin miwah pangupajiwa pratisentana manut swadarmaning guru rupaka.
- (5) Palas sangkaning wicara patut katunasang pamikukuh ring sang Rumawos (Pengadilan Negeri).
- (6) Swadarmaning Prajuru Desa/Banjar nganinin indik palas marabian (nyapian);
- ha. Yening wenten krama sane pacang palas marabian tur masadok ring Prajuru Desa/Banjar nartayang pariindik polah palih nyane marabian, saha Prajuru Desa/Banjar wenang ngawehin piteket, pitutur mangda alaki rabi prasida adung;

na. Yening usaha Prajuru inucap ring ajeng tan maresidayang, wawu kalaksanayang tata cara palas marabian sekadi kecap ring ajeng, maduluran:

1. Ilikita kasujatian saking sang mawicara mungguwing kalascarian dadalan palase;
2. Kacumponin antuk kulawarga purusa lan pradana.

Powos 68

Prade riwekas sang palas marabian adung malih, patut:

ha. Ngalaksanayang upacara pawiwahan malih manut sekadi pawos ring ajeng, sanistan nyane pawiwahan alit (pasakapan dipedesan).

na. Keni pamidanda manut paruman Banjar soang-soang.

Pawos 69

(1) Soang-soang balu kabinayang dados :

ha. Balu luh wit sentana (rajeg) miwah balu luh boya sentana.

na. Balu muwani kapurusan miwah muwani nyeburin (boya sentana).

(2) Swadarmaning balu inucap patut:

ha. Ngamanggehang patibrata, tan kengin ngamargiang paradara/ dratikrama.

na. Nguwasayang waris, lan paguna kayan, tan kengin ngadol ngadeang, makidhang, sajawaning wenten kabebasan saking oka utawi pakulawargan pinih tampek saking rabi (prade oka kanton alit-alit).

- ca. Kengin ngidih sentana, prade sampun wenten pidabdab sadurung sinalih tunggil lampus saha babebasan antuk kulawarga sinanggeh kapurusan.
- (3) Kawenangan mawiwaha malih, prade sampun polih paigum saking ipianak daha/ teruna utawi kulawarga kapurusan, tur prasida ngupajiwain, saha yaning ipun balu muani nyeburin, patut kaperas riin.

Pawos 70

- (1) Balu kaucap tan pageh luire :
- ha. Dratikrama/paradara;
- na. Matilar saking kakubon tanpa sadok pinih suwe 6 (enem) sasih;
- ca. Lempas ring swadarmaning balu, tan prasida ngesehin solah maprawerti arep pituduh pakulawargan kapurusan.
- (2) Yening macihna kadi ring ajeng manut tri premana wong balu inucap inggian balu luh boya sentana rajeg miwah balu muwani nyeburin, kengin :
- ha. Kabudalang antuk kulawarga kapurusan;
- na. Tan polih upon waris, kemawon kengin pahan pagunakayan.

Palet 3

Indik Sentana

Pawos 71

- (1) Indik sentana wenten tigang soroh inggih punika :

ha. Pratisentana wiadin sentana rajeg;

na. Sentana paperasan.

ca. Sentana astra

- (2) Pratisentana inggih punika sentana sane metu saking pawiwahan.
- (3) Prade pawiwahan tan ngawetuang sentana kengin ngidih sentana antuk upasaksi sekala niskala sane kawastanin sentana paperasan.
- (4) Prade tan wenten parabian, raris ngewetuang sentana, kabawos sentana astra/babinjat.

Pawos 72

- (1) Ngangkat sentana manut dudonan patut macihna upakara pamerasan saha kasaksiang sekala niskala.
- (2) Sapasira ugi krama pacang meras sentana patut masadok dumun ring Prajuru sanistane asasih sadereng pamerasan.
- (3) Bendesa Pakraman patut nyiarang sawewidangan desane, sang sapasira ugi rumasa tan lila mangda nyadokang masengker awuku sabanen pamerasan ring Bendesa/ Kelihan.
- (4) Bendesa/Kelihan digelis mawosang saha ngicenin pamutus, nepek ring catur drestane miwah pararem.

Pawos 73

- (1) Pamerasan sane sinanggeh patut ring Desa Pakraman Ubung risampune makacihna:
ha. Widi-widana pamerasan;
na. Kasaksiang antuk Prajuru Pakraman lan Prajuru Dinas saha kasiarang ring paruman Desa/Banjar;

- ca. Wenten ilikita, mungwing tata sulur pamargin pamerasan,
makadi polih babebasan saking keluargannyane;
- (2) Sane patut kaperas anggen sentana kadi ring sor puniki :
- ha. Jadma sane maagama Hindu;
- na. Papernahan saking sang meras;
- ca. Turunan saking yayahnyane, yan tan wenten kengin
saking turunan mingsiki/ mindon saking purusa, yan taler
tan wenten kengin saking wadon, yaning prade ten
wenten saking sapenunggal ring katurunan lanang wiadin
wadon kengin sakita kayun.
- (3) Kengin meras sentana lintang ring adiri manut kayun sang
ngarsayang, lanang wiadin wadon.

Palet 4

Indik Warisan

Pawos 74

- (1) Warisan inggih punika tatamian arta brana saha ayah ayahan
ngupadi sukerta sekala niskala saking kaluwurannyane arep
ring turunannya.
- (2) Sane sinanggeh warisan luire :
- ha. Duwe tengah, makadi bukti Pura/Dadia/Paibon, siwa
krana lsp;
- na. Pamerajan (sangguh kamulan);
- ca. Pagunakayan, tatatadan, jiwa dana, utang piutang lsp.
- (3) Wawu kengin kabawos warisan prade :
- ha. Wenten sang mapiturun;

- na. Wenten turunannyane sane patut ngawarisin;
- ca. Wenten arta brana miwah tategenan/ayah-ayahan marupa warisan.

Pawos 75

- (1) Sane patut ngawarisin luire :
 - ha. Pratisentana purusa;
 - na. Sentana rajeg;
 - ca. Sentana paperasan lanang utawi wadon.
- (2) Prade tan wenten sekadi ring ajeng kang sinanggeh patut ngawarisin :
 - ha. Turunan purusa pernah mungguhahang, mekadi rerama, misan, mindon;
 - na. Turunan purusa kasamping, mekadi keponakan, misan, mindon.

Pawos 76

Pangepahan Warisan

- (1) Risampun kalaksanayang Pitra Yadnya lan utang-utang pawaris buntas katawur.
- (2) Sang patut ngawarisin polih pahan pada, sangkaning pagunakayan, sajabaning karang bukti palaba Pura kemaon.
- (3) Sinalih tunggil sane patut ngawarisin (pangewaris) ring ajeng prasida tan polih pahan prade:
 - ha. Matilar (magentos) saking agama Hindu (Guru Swadyaya).

- na. Alpaka Guru Rupaka.
- ca. Sentana rajeg, kesah mawiwaha miwah pratisentana nyeburin, soang-soang kabawos ninggal kadaton.
- (4) Prade tan pangewaris kengin muponin kemanten, anut dudonan :
- ha. Sentana luh, selami durung kesah mawiwaha utawi alpaka guru, prade lokika sanggraha mawastu madruwe oka (pianak), kengin ngawaris pegunakayan sentana luh inucap mekadi biangne.
- na. Balu luh wiadin balu muwani nyeburin (boya sentana).
- ca. Mulih daha utawi teruna, riantukan ring pawiwahane pecak sampun ninggal kadaton.
- (5) Pawaris kengin mapeweweh rikala maurip pinaka :
- ha. Jiwa dana, tatatadan/bekel, makacihna paweweh tetep ring ipianak sane kesah mawiwaha.
- na. Pangupajiwa, paweweh padgata kala pawaris maka pamupon hasil kemawon.
- ca. Pedum pamong/pedum raksa, pahan waris padgatakala ngantos pedum jenek saking pawaris arep ring pangewaris.

Pawos 77

- (1) Yening sajeroning kulawarga sane wenten pangewaris langkungan ring adiri patut:
- ha. Kawentenang paigum indik paduman waris punika;
- na. Yening tan prasida pamutus bawos ring paigum punika patut katunasang tatimbang ring Kerta Banjar/Desa;

- ca. Yening ring pangertan Desa kanton nenten mrasidayang, patut katunasang babanding ring Majelis Desa Pakraman.
 - ra. Ring Majelis Desa Pakraman kanton taler tan prasida pamutus bawos patut pariindikan punika kalanturang ring Sang Rumawos (Pengadilan).
- (2) Prade wenten karang bukti pura kaputungan, wenang sang Prajuru Desa mawosin (nureksain sila-sila/sulur pakulawargan) tur nibakang ring :
- ha. Ahli waris saking purusa;
 - na. Papernahan kasamping, yening tan wenten papernahan ngunggahang;
 - ca. Taler nenten wenten sakadi kecaping aksara ha, na ring ajeng, kengin katibakang ring wadone;
 - ra. Prade taler tan wenten angka aksara ca ring ajeng wawu kengin sakama-kama, sakewanten mangda patunggalan Desa Pakraman Ubung miwah maagama Hindu.
- (3) Swadarmaning pangewaris (ahli waris) patut:
- ha. Narima saha ngutsahayang tatamian pahan saking keluhurannya, makadi ngarempon sanggah, pura, saha pangupakara miwah panyeledihi ayah-ayahan pawaris;
 - na. Ngabenang pawaris saha ngalanturang upakara ring dewa pitara;
 - ca. Nawurin utang-utang pawaris.

SATHAS SARGAH
WICARA LAN PAMIDANDA

Palet 1

Indik Wicara

Pawos 78

- (1) Sane wenang mawosin mekadi mutusang pawicara ring Desa Pakraman luire :
- ha. Kelihan Banjar/Kerta Banjar, prade sang mawicara patunggalan babanjaran;
- na. Bendesa Pakraman, prade sang mawicara mabinayan bebanjaran;
- Sang rumawos ring ajeng sinanggeh Kerta Desa.
- (2) Prade sang mawicara tan cumpu ring pamutus wicara utawi tata cara ring babanjaran, kengin nunas babanding ring Bendesa jantos kapengertan Desa (Paparuman Desa).
- (3) Taler yening tan cumpu ring pamuput pangertan Desa, kengin nunasang wicara inucap ring Majelis Alit ngantos ke Majelis Utama Desa Pakraman.
- (4) Yening pamuput ring Majelis Desa Pakraman taler tan cumpu, wawu katunasang ring Sang Rumawos (Pengadilan).

Pawos 79

- (1) Sahanan wicara sane mawiwit kacorahan sakaluire, miwah sinanggeh nungkasin daging awig-awig, pasuara, pararem Desa Pakraman, prajuru desa patut digelis mawosin tan nyantos wenten piuning.

- (2) Sajawaning wicara sane ring ajeng, Kerta Desa Pakraman patut nyantosang pasadok sang nunas bawos.
- (3) Panepase mangda pastika nyantenang iwang patut malarapan Tri Pramana (saksi, llikita, bukti) saha tan maren nepek minakadi:
- ha. Loka Dresta, Kasinahang pamargin yen ala, sih, ayu manut geguat-geguat;
- na. Desa Dresta, Nganutin pamargine ring awig-awig Desa;
- ca. Purwa Dresta, Nganutin pamargine kadi riya-riya;
- ra. Sastra Dresta, Nganutin Sastra Dresta Agama Hindu.

Palet 2

Indik Pamidanda

Pawos 80

- (1) Desa utawi Banjar pakraman wenang ni wakang pamidanda ring warga Desa/Banjar sane sisip.
- (2) Paniwak inucap kalaksanayang olih Bendesa Pakraman utawi Kelihan Banjar nunggal-nunggal manut dudonan.
- (3) Agung alit pamidanda mesor singgih manut ring kasisipane tur paniwaknyane mangda pastika ring catur naya sandi mekadi:
- ha. Sama, Krama utawi prajuru sami-sami keni pamidanda;
- na. Beda, Paniwak pamidanda wenang mabinayan manut sor singgih Kasisipan;
- ca. Dana, Pamidanda kalaksanayang madasar antuk pikayun tresna-sih (maitri);

ra. Danda, Laksana utawi tatujon wantah mralina kasisipan/mapitulung (karunia), ngamanggehang kasudemalan desa.

(4) Bacakan pamidanda luire :

ha. Panebus kasisipan antuk ayahan;

na. Danda arta miwah panikel-panikelnya;

ca. Pangampura/panyewaka;

ra. Upacara panyangaskara;

ka. Kasepekang manut sengker, prade wenten krama tan dados glemekin (ngelaleng bangke);

da, Kararianang makrama.

(5) Jinah utawi arta brana pamidanda patut ngaranjing Druwen Banjar/Desa.

SAPTAMAS SARGAH

NGUWAH-NGUWUHIN AWIG-AWIG

Pawos 81

- (1) Nguwah-nguwuhin awig-awig Desa Pakraman Ubung puniki kalaksanayang antuk paruman Desa.
- (2) Paruman inucap mangda kadasarin antuk Pakarsan Krama Desa Pakraman Ubung.
- (3) Pamutus bawos mangda madasar antuk paingkupan utawi gilik saguluk.

Pawos 82

- (1) Paruman indik nguwah-nguwuhin awig-awig ring ajeng kengin kamedalang antuk Prajuru Desa/Bendesa, Kelihan-Kelihan Banjar, yadiastun niri-niri utawi sinarengan.
- (2) Nguwah-nguwuhin awig-awig puniki manut pangala desa lan pararem.

ASTAMAS SARGAH

SAMAPTA

Pawos 83

- (1) Awig-awig puniki kawastanin awig-awig Desa Pakraman Ubung
- (2) Awig-awig puniki kamargiang ngawit kararemin.

Pawos 84

- (1) Awig-awig puniki pinaka panguwah-nguwuhin saking awig-awig sane sampun wenten warsa 1982 lan warsa 2003.
- (2) Sakeluwiring sane durung kabawos sajeroning awig-awig puniki patut kalaksanayang manut tata cara sane sampun ketah mamargi, kadulurin antuk pararem-pararem.

Pawos 85

- (1) Nguwah-nguwuhin Awig-awig puniki kararemin duk rahina, Saniscara Kliwon Kuningan, Warsa Caka: 1937, pinanggal masehi 20 Pebruari 2016, ring Pura Desa, Desa Pakraman Ubung.

- (2) Awig-awig puniki kalingga tanganin antuk Bendesa kasarengin antuk Kelihan-Kelihan Banjar sawewidangan Desa Pakraman Ubung saha kasaksinin antuk Prajuru Dinas Kelurahan Ubung, makamiwah kapikukuhin antuk Walikota Denpasar.
- (3) Luwir panglingga tangan awig-awig puniki :
- ha. Kapertama Prajuru Desa Pakraman.

1. Bendesa,

Drs I Dewa Putu Mayun

2. Kelihan Banjr Sedana Mertha,

3. Kelihan Banjar Tengah,

I Wayan Karsika.

I Gede Nyoman Sasmita

4 Kelihan Banjr Sari,

5. Kelihan Banjar Batur,

I Wayan Sedana

I Made Sudiawan

6. Kelihan Banjar Mertagangga,

I Made Rai Sutarja, SE

PAKELING

Prajuru Desa Pakraman Ubung, duk nyuratang paweweh awig-awig puniki kasanggra ituk Prawartaka Nguwah-nguwuhin Awig-awig Desa Pakraman Ubung, luire :

Pamucuk : Drs. I Dewa Putu Mayun,

Petajuh : Drs. I Nyoman Sarma, BBA,

Penyarikan : I Made Jesna.

I Wayan Ariyanta, SH.

Patengen : I Made Sunarta, SE.

Bidang Sukerta Tata Agama :

1. I Putu Suwarya.
2. Mangku I Gde Suweda.
3. Mangku I Ketut Suanta.
4. I Dewa Made Raiyana.
5. I Putu Gede Suandita.
6. I Made Pustaka

Bidang Sukerta Tata Pawongan :

1. I Wayan Sudika, SH.
2. I Dewa Putu Raka.
3. I Wayan Wardana
4. I Made Darmaja, BSc.
5. I Anom Nata.
6. I Wayan Suyasa

Bidang Sukerta Tata Palemahan :

1. I Putu yudi Atmika, SH.
2. I Nyoman Gde Miyasa.

3. I Wayan Miarsa.
4. I Dewa Made Ardana.
5. I Made Sudiawan.
6. I Made Rai Sutarja, SE

Bidang Wicara Ian Pamidanda:

1. I Nyoman Sudarsana, S.sos.MSi.
2. I Made Sugita.
3. Drs. I Dewa Kompyang Gde.
4. I Nyoman Adi Adnyana.
5. I Putu Wiryana, SH.
6. I Ketut Seguna, SE.

Sajawaning Prawartaka ring ajeng, taler kasanggara antuk Team Konsultasi panyuratan Awig-awig Desa Pakraman Fakultas Hukum Universitas Udayana Denpasar.